

采芳隨筆卷九

北平查 彬伯埜輯

丁香花愁品也三四月開木本柔條花開如粉團四瓣成穗而下結球花如丁香紫白二色山堂肆考以為百結花張景修稱為素客西溪叢話稱為情客即近日所種之丁香花也又有一種名丁子香又名雞舌香一名支解香出交廣子出蕊上如釘長三四分紫色樹高丈餘木類桂葉似櫟葉花圓細黃色其子有麤大如山茱萸者俗呼母丁香即雞舌香也唐錢仲文起詠池上雙丁香樹云得地移根遠交柯繞指柔露香濃結桂池影鬪蟠

虬黛葉輕筠綠金花笑菊秋何如南海外雨露隔炎洲
即本草羣芳譜諸書所載之丁香也近時陳其年白丁
香花賦云爾其花壓半簷香籠一樹蒼小偏嬌苞纖逾
嫋墻邊寂寂雪狸亂撲以疑無月底瓏瓏白燕深藏而
易誤何曾肥艷鬪門外之梨花絕不輕狂趁陌頭之柳
絮數枝暗拆三更之銀漏同清萬朶爭開十丈之紅樓
頓素甫麗殺以酥融旋紛披而綺互初掩冉以臨風復
鈴屨而怯雨况復銅駝巷側丹鳳城隈春深緩去夏淺
徐來訝雕櫳之鮮杏憐綺閣之無梅候尚遲夫芍藥節
未屆乎玫瑰此花於是呈皓質綻瓊腮歌宛轉舞培塿

春無霜兮霜泥泥晝少月予月皚皚越艷聞名喚作枕
邊之墜珥燕姬耀首折為馬上之橫釵何能不翫茗華
而製賦盱玉樹以停杯也哉疇昔之年雙花可憐參差
並媚攬抱交妍倏紫姑之不見俄紫玉之成烟花謝予
紫臺難到月沈兮紫府難圓賸一堆之粉淚溼萬縷之
香綿桐是孤生莫綰同心之結藥名獨活空思續命之
緣惜此離於綺節託惆悵於哀絃春去予堂堂花開兮
斷腸願將花下土燒作紫鴛鴦金元遺山賦瓶中雜花
云香中人道睡香濃誰信丁香臭味同一樹百枝千萬
結更應薰染費春工明許邦才詩云蘇小西陵蹋月迴

香車白馬引郎來當年剝綰同心結此日春風為翦開
近時張蕭亭實居白丁香云十載題詩苦未工幾番辜
負玉璫瓏人含舊恨青山外花結新愁細雨中姑射神
人原似雪中朝名士解談空杜鵑聲裏春將老濁酒蒼
苔興不窮陳其年白丁香云丁香字簾邊丁香子香花開時
節倍悵悵團團晝挂三更月暮歷春飄半院霜照處偏
宜紅蠟燭看時雅稱白衣裳如何打得同心結只與安
仁助悼亡馬源思澄白丁香云珠樹紛相望踈枝更透
揚寒香堪一摘冷艷失羣芳坐覺人顏淡開憐春日長
階前手自護漸看已成行陳青崖至言白丁香云幾樹

瑶花小院東分明素女傍簾櫳冷垂串串玲瓏雪香送
絲絲麗殺風穩稱輕奩勻粉後細添薄鬢洗粧中最憐
千結朝來折十二闌干玉一叢家初白詩云花繁葉密
暗迴廊為放空庭特撒牆翠幕雲遮天四角紅燈人醉
樹中央春辭小院離離影夜受輕衫漠漠香曾是往年
連榻地重來容易感流光又白丁香花云誰教巧手作
瓊英四出真從六出爭一夜花光如積雪悞他啼鳥報
天明買得初從廟市回朱白費疑猜只憑狡獪花
兒匠偷取唐昌玉蕊來又白丁香云絕代人宜空谷幽
幽香愛傍玉搔頭憑誰為解梢梢結減我東欄向夕愁

滿城踈雨滿天風。滿地狂花只取紅。獨向枝頭賞冰雪，
莫欺老眼太朦朧。粉墨何當點作圖。畫家真色自應殊。
依稀寒食梨花榭。月底看來淡欲無。鄒泰和升恒丁香
花云春空烟鎖。綴星星。兩樹瓊枝占一庭。交網月穿珠
絡索。小鈴風動玉冬丁。傍簷結密人難折。拂座香多酒
易醒。只恐天花散無迹。擬將湘管寫娉婷。趙谷林是白
丁香云雪色生香。貯案頭繁枝歷亂數清幽。客中腸結
春風暮花欲愁時。我亦愁。杭厘浦紫丁香云晚風吹月
過闌干。一樹濃香未放殘。應是天工矜色相。紫雲開朶
借人看。一色濃華鈿朶勻。午蜂作意鬧殘春。何人最有

紅潮頰貼上瑤環更可人閒庭疑有紫霞蒸飛上瓊枝
艷不勝欲向花前喚歌舞座中誰解鵠紋綾于敦殷輅
紫丁香云泉明之菊茂叔蓮名花每藉名人傳古人幽
賞本絕俗後來傳會翻拘纏豈知愛花必法古其俗在
骨醫難痊瀛洲仙客詩中仙春盤速客吟花前三春桃
李方暄妍吟情却在幽欄邊欄邊一樹春條弱紫姑夜
降來嬋娟杏雨半沾紅暈淡梨雲勻染脂痕鮮風褰薇
帳霞初起日炙榴環火未然石家步障銷金縷謝氏羅
囊沈水湔花光如此那惜醉酒釣記藉催觥船主人愛
花不愛酒對客能賦還能顛我非酒人况詩客黃緣幸

上郇公筵因思此花實殊絕得入吟吻非偶然柳枝嫁
後潘妃老留題往往無全篇江梅不經楚客賦海棠未
列花溪編寒枝繁蕊共寂寞久隨蔓草縈荒烟何緣開
向生花筆當筵倚醉抒吟箋繪影摹形兼辨色妃青儷
白窮雕鐫定識花關傳故事來朝市上價值千酌酒語
花漫如結花亦解事增便嬛迴身舞向紫薇客嫣然欲
笑風褊襪胡穉威天游紫丁香云春如五日閒京兆花
對三生杜牧之已落猶開憐晼晚細看微惜轉依遲正
難風月流連地忍負樽罍泛艷時休被芳枝更相笑枉
將塵事背佳期陳句山兆崙同作云病起三旬鬢有絲

匆匆馳馬欲何之花開此地來須早春到今年去較遲
座客儼同何水部主人疑是鄭當時緩催象箸孤斟酒
飲啄原非預可期先叔祖榕巢公紫丁香花歌云春陽
作暄花事濃萬卉爭光鬪嬌嫵媽紅姹紫紛陸離如火
如荼塞亭圃就中丁香尤麗都李俗桃輕迴難伍我家
結廬城南鄉曠者宜田奧宜宇茲花開日春正妍不惜
樽罍醉簫鼓今年春作城中遊軋軋雙輪碾塵土臨風
怊悵歸去遲竊恐飛英落如雨松吹先生我故人庭有
名花恰當戶登堂靜對娟娟容彷彿南鄉花乍吐高枝
似裊紫玉烟低影還如紫雲舞柔肌纖骨不勝扶細眼

明眸疑欲語蒙茸亂蕊笑紫荆更比紫薇重難舉羨君
深院金屋同貯此娉婷十三女看花有客昨朝來聞道
吟聲滿環堵惜哉良會小差池未及花前倒清醕繁華
盡逐風波流已去韶光喚誰補先生高致超尋常一室
從容考今古晨昏坐卧清香生身與名花合稱主此花
自昔少留題喜見詩成羣玉府牀頭如輯種樹書應採
瑤章入花譜陳其年愁春未醒云攀來尚隔望處偏清
算開到此花闌珊春已在長亭滴粉搓酥小紅牆角倍
分明明年年此際籠歸馬上遞徧春城昨歲看花有人禿
袖擘阮捱箏悵新來梁間燕去往事星星只有鄰花依

依不作路旁情夜深難睡繽紛花影飾滿空庭又白丁香一叢花云一枝低亞晚粧臺吸露沁蘭胎李花柳絮都難似染梨雲一色新裁白粉墻邊水明樓上動竊玉情懷纍纍銀粟費安排爭趁月中開曾經打就心頭結相看處脉脉疑猜記得重門和他小摘此事十年來所詠皆近日所種百結花也王漁洋丁香木筆牀云結蕊曾同荳蔻胎蟠根猶倚硯山隈願同海底珊瑚樹特與徐陵架筆來

附錄

臭梧桐一名百日紅與紫薇名同物異吳地野生花色淡無植之者淮揚間成大樹花微者縉紳家植之中庭

或云後庭花也獨閩中此花紅鮮異常能開百日故名
花作長鬚亦與吳地不同園林中植之灼灼出矮牆上
至生深澗中與清泉白石相映斐然奪目永嘉人亦謂
之丁香花

紅豆蔻花宜品也生南海諸谷一名高良薑一名蠻薑陶宏

景言此薑始出高良郡故名高良即今高州漢為高涼其苗如蘆其葉如薑春末

發初開花抽一幹有大籜包之籜解花見一穗十莖淡

紅鮮妍如桃李花色甚重則下垂如葡萄又如火齊纓

珞及翦綵鸞枝之狀每蕊心有兩片人謂之比目連理

云此花結子名紅豆蔻南人取其未大開者謂之含胎

花又有白豆蔻出迦古羅國呼為多骨形如芭蕉葉似

杜若花淺黃色子圓大如縮砂仁其殼白厚又有草豆

蔻一名漏蔻一名草果金光明經謂之蘇乞迷羅納嶺

南皆有之苗如蘆葉似山薑根似高良薑二月開花作

穗房生於莖下嫩葉卷之而生初如芙蓉花微紅穗頭
深紅色其葉漸廣花漸出而色漸淡亦有黃白色者實
若龍眼子如石榴瓣初結時即頗取紅鹽乾之纔如小
舌可薦酒所謂紅鹽草果鸚鵡舌也花經豆蔻花四品
六命唐李涉句云瘴山江上重相見醉裏同看豆蔻花
韓君平翹句云春生豆蔻枝杜牧之句云娉娉嫋嫋十
三餘豆蔻梢頭二月初宋范石湖詩云綠葉蕉心展紅
苞竹籜披貫珠垂寶絡翦綵倒鸞枝且入花欄品休論
藥裏宜南方草木狀為爾首題詩

錄附

山薑花生九真交趾閩廣皆有之莖葉皆薑但根不堪

食花赤色與豆蔻花相似而微小花生葉間作穗如麥

東人呼為山薑

與杜若同名

南人呼為美草唐劉夢得禹錫

詩云故人博羅尉遺我山薑花採從碧海上來自謫仙
家雲濤潤孤根陰火照晨葩靜搖扶桑日艷對瀛洲霞
世人受苦辛寒擷忘幽遐傳名入帝里飛騎辭天涯王
濟本尚味石崇方鬪奢雕盤多不識綺席乃增華驛馬
損筋骨貴人滋齒牙顧予藜藿士持此重咨嗟又詩云
採擷黃薑蕊封題青瑣闈共聞調膳日正是退朝歸響
為纖筵發情隨綠翰飛故將天下寶萬里與光輝先叔
祖榕巢公詩云寂寂山林道行行日已西山花紅艷處

恐是杜鵑啼

附錄

肉豆蔻一名肉果一名迦拘勒開花結實皆似豆蔻而無核皮肉之顛外有皺紋而內有斑纈紋如檳榔紋與草豆蔻不同

錦帶花美品也出荆楚間條如郁李春末方開紅白二色
蜀山中處處有之長蔓柔纖花葉間側如藻帶然因象
作名故名錦帶花開形如飛鳥里人亦號鬢邊嬌萬花
谷云貢士舉院本勇技營有花初開白次綠次緋次紫
故又名為文官花宋王元之云維揚人傳初得于海州
山谷間花未開如海棠既開如木衣而繁麗嫋弱過之
一朶滿頭冠不克荷惜其不香無子子謂此花實不在
海棠下宜以海仙為號且賦詩三章以存其名云一堆
絳雪壓春叢嫋嫋長條弄晚風借問開時何所似似將
繡被覆熏籠春憎窈窕教無子天為妖嬈不與香盡日

含毫難比並花中應是衛莊姜何年移植在僧家一簇
柔條綴綵霞錦帶為名俚且俗為君呼作海仙花范石
湖成大詩云妍紅棠棣妝弱綠薔薇枝小風一再來飄
颻隨舞衣吳下嫵芳檻峽中湍荒陂佳入墮空谷皎皎
白駒詩楊誠齋萬里詩云天女風梭織錦機碧絲池上
茜鸞枝何曾繫住春歸脚只解縈長客恨眉節節生花
花點點茸茸曬日日遲遲後園初夏無題目小樹微芳
也得詩楊吳齋詩云萬釘簇錦若垂紳圍住東風穩稱
身聞道沈腰易寬減何妨留與繫青春鵲袍換綠契初
心旋賜銀緋與紫金堪念紛紛名利客對花應自嘆侵

等

| | | |
|--|--|--|
| | | |
|--|--|--|

翦春羅碎品也一名翦紅羅一名碎翦羅蔓生高尺餘柔
莖綠葉似冬青而小對生抱莖入夏開深紅花如錢大
凡六出周迴如翦成茸茸可愛宋翁道源元廣詩云誰
把風刀翦薄羅極知造化著功多飄零易逐春光老公
子樽前奈若何明徐文長渭畫翦春羅垂絲海棠云美
人睡不足春愁奈若何垂絲綠牕下聊為繡春羅近時
錢稼軒維城題畫翦春羅云早護短筇籬下種還陪雙
杵月中開香絨也說秋來好不及單衣稱體裁

附錄

翦秋羅一名漢宮秋色深紅瓣分數歧尖峭可愛八月
間開草花譜云春夏秋冬羅各以時名春夏二羅色黃

紅不佳秋冬二羅紅深色美又有翦羅花色紅出南越
性畏寒又有翦金羅黃色甚美麗近時錢稼軒題畫翦
秋羅云蝶翅飛殘鬧婦妝園林即次已無香西風竄鮮
催刀尺一夜雕叢競繡裳錢竹初維喬種剪秋羅云鶻
啼不逐秋烟死美人暝紅在十指離離曉日照更嬌一
簇嬌攢鏡波裏百錢市上乍買歸籬根低插紛葳蕤莫
嫌花葉太瑣瑣女青那及男青肥渥丹顏退榴房老冷
落胭脂眉的少爭知刀尺暈愁心碎翦朝霞帖幽草王
東田友亮翦秋羅云秋雲薄似羅天半空舒卷何似綺

階前裁成付并翦

附錄 翦紅紗一名翦秋紗高三尺葉旋覆狀如石竹花而稍

大四圍如翦瓣鮮紅可愛

| | | |
|--|--|--|
| | | |
|--|--|--|

酴醾花韻品也本作荼蘼藤身灌生青莖多刺一類三葉
如品字形葉面光綠背翠色多缺刻花青跗紅萼及開
時變白帶淺碧大朶千瓣香微而清盤作高架二三月
間爛漫可觀折置書冊中冬取插鬢謂之花腊一種色
黃似酒故加酉字以蜜色似酴醾酒耳香減於白花清
異錄云酴醾木香事事稱宜故賣插枝云百宜杖杖此
洛社故事也一名瓊綬帶一名雪纓絡陶子召客撰小
名有七曰賽白曰蔓君曰四寧天花曰花聖人曰慈恩
傅粉綠衣郎曰獨步春曰沈香密友成都又有白玉碗
出爐銀雲南紅等種張翊花經酴醾一品九命曾端伯

取為韻友張敏叔呼為雅客西溪叢話稱為才客或呼
為玉友飛花墮酒號為飛英會露凝澤髮貢曰薔薇水
宋晏同叔殊句云玉女雕瓊蕊仙禽借菊衣謝堯仁句
云下騰赤蛟身上抽碧龍頭千枝蟠一蓋一蓋簪萬球
花要帶月看香要和露收一點落衣袂經月氣未休一
摘入釀瓮經歲味尚留宋子京祁句云來自蠶叢國香
傳弱水神又云無華真國色有韻自天香韓持國維詩
云平生為愛此香濃仰面常迎落架風每至春歸有遺
恨典刑猶在酒杯中又惜荼蘼云天意再三珍雅艷花
中最後吐奇香狂風莫掃殘英盡留與佳人貯絳囊歐

陽永叔詩云清明時節散天香輕染鴛兒一抹黃窠是
風流堪賞處美人取作浥羅裳劉貢父攸詩云明紅暗
紫競芳菲送盡東風不自知占得餘香慰愁眼百芳無
得似荼蘼東坡詩云酴醾不爭春寂寞開窠晚青蛟走
玉骨羽蓋蒙珠幃不妝艷已絕無風香自遠淒涼吳宮
闕紅粉埋故苑至今微月夜笙簫來翠巘餘妍入此花
千載尚清婉怪君呼不歸定為花所挽昨宵雷雨惡花
盡君應返又和文與可洋州園池酴醾洞云長憶故山
寒食夜野荼蘼發暗香來分無素手簪羅髻且折霜蕤
浸玉醅頽濱詩云後圃荼蘼手自栽清於芍藥醜于梅

舊來酒客今無幾三嗅馨香懶舉杯又詩云蜀中醪醕
生如積開落春風山寂寂已憐正發香晻曖猶愛未開
光的皪半垂野水弱如墜直上長松勇無敵風中婀娜
應數丈月下煌煌真一色故園聞道開愈繁老人自恨
歸無日百花已過春欲暮燕坐繩牀空歎息朝來滿把
得幽香案頭亂插銅瓶濕一番花蕊轉頭空誰能往問
天台拾黃山谷詩云肌膚冰雪熏沈水百草千花莫比
芳露濕何郎試湯餅日烘荀令炷爐香風流徹骨成春
酒夢寐宜人入枕囊輸與能詩王主簿瑤臺影裏據胡
牀又詩云梅殘紅藥遲此物共春暉名字因壺酒風流

付枕幃墜鈿香徑草飄雪冷垣衣玉氣晴虹發沉材鋸
屑霏直知多可厭何忍摘令稀常恨金沙學顰時正可
揮又詩云漢宮嬌額半塗黃入骨濃薰賈女香日色漸
遲風力細倚闌偷舞白霓裳王民瞻庭珪白云殘春鈴
閣無公事來就醪醪放晚衙晁无咎詩云天紅瑣碎競
春嬌後出何妨便奪標雲鶴嬉晴來萬隻玉龍驚震上
千條蓐收晃蕩風前仗萼綠飄翩月下綃曾向瓊林亭
畔見天涯相遇一魂銷劉彥冲子翬詩云榮華休羨黑
頭公且對芳晨賞麗叢十萬青條寒挂雨三千粉面笑
臨風莫將擬雪才情賦盍與觀梅况味同只恐春歸有

遺恨典刑猶在濁醪中又詩云顛風急雨退花晨翠葉
銀苞照眼新高架攀緣雖得地長條盤屈總由人橫釵
數朶開猶小撲酒餘香韻絕倫惟有金沙顏色好年年
相伴殿殘春楊誠齋詩云仰架遙看時見些登樓下瞰
脫然佳醪醺蝴蝶渾無辨飛去方知不是花醪醺約我
早來看及至來看花已殘動地寒風君莫怯亂吹香雪
灑闌干又詩云花飛六不啻五六青子團枝朱紫簇江
南桃李總成陰不論少城與韋曲荼蘼珍重不浪開晚
堆綠雲點冰玉體熏山麝非一臍水洗銀河費千斛滴
成小蓓密於糝亂走長條柔可束醉眸須及月下來破

鼻試從風裏觸先生未必被花惱偶與門人暮春浴為
憐壓架十萬枝小立旁邊領新馥剩拚好語寵瓊蕤更
掇清英付醞醪先生何得便杜門霜鬢猶須玉堂宿又
謝張功父送奈縻云西湖野僧夸藏冰半年化作真水
精南湖詩人笑渠拙不知儂家解乾雪藏冰窖子山之
幽鏡透九地山鬼愁儂家藏雪有妙手分明曬在翡翠
樓向來巽二拉滕六玉妃夜投玉川屋翦冰作花吹朔
風揉雲為粉散寒空醉揮兩袖拂銀漢梢頭萬斛冷不
融瓊田挈月拾翠羽砌成重樓天半許盤作青蛟吐綠
霧亂飄六出熏沉炷人間雪脆那可藏天上雪落何曾

香三月盡頭四月首南湖香雪今誰有分似誠齋老詩
叟碎接玉花泛春酒一飲一石更五斗王梅溪句云風
枝張雨蓋露臉汗何郎收拾歸醺醪芳姿韻更香曾文
昭肇句云國艷寧施粉天香自染衣張芸叟詩云冰肌
雪艷映殘春燠日薰風入四鄰任是主人能愛惜也拚
一半與遊人程金紫敦厚句云素月共成中夜色好風
分散四鄰香劉後村詩云青蛟蛻骨萬條長玉架盤雲
護曉窓外面看來些子葉中間著得許多香一枝縞色
分明好百卉含羞不敢芳飛殺銜花雙海燕被渠勾引
一春忙吳毅夫句云可堪收拾歸屏枕頗欲浮沈付酒

杯鄭子聃句云玉斧無人解修月珠裙有意欲留仙崔
德符鷄詩云春風亦已老自厭丹采媚獨留白雪花灑
此千尺翠嵯峨珠籠冠縹緲冒佛髻幽香勿襲人恐為
真色累但願保明姿終日奉清對要之萬物黜汙潔自
有類盧蒲江祖臯詩云雪榦雲條一架春酒中風度夢
中聞東風不是無顏色過了梅花便是君徐竹隱似道
詩云紛紛紅紫落莓苔帶月和烟特地開疑是玉妃新
浴出翠雲梯上舞風臺方秋崖詩云山徑陰陰雨未乾
春風已暖却成寒不緣天氣渾無準要護荼蘼繼牡丹
手插春風十萬條野香落架玉搖搖黃鸝莫悞看花眼

等得南薰雪未消謝學遜幼謙詩云香雪支離半墜風
柔條無奈不成叢阿蠻如許風流骨打困秋千細雨中
任拙齋詩云一年春事到荼蘼香雪紛紛又撲衣盡把
檀心好看取與留春住莫教歸湛道山詩云雨後溪流
半沒沙粉墻賣酒是誰家客中不覺春深淺開了荼蘼
一架花一春多雨少晴光眼底青春去意忙已恨點衣
紅作陣絕憐滿架雪生香朱淑真詩云花神未許春歸
去故遣仙姿殿衆芳白玉體輕蟾魄瑩素紗囊薄麝臍
香夢思洛浦嬋娟態愁記瑤臺淡淨妝勾引詩人清絕
處一枝和雨在東墻金元遺山詩云枕幃餘韻最清真

夢裏猶來著莫人擬借濃陰作羅幕玉纓多處卧殘春
劉光甫仲尹詩云相看絕似好交友著眼江梅季孟中
海窟笙簫來鶴背月林冰雪繞春風滿前玉蕊名尤重
特地梨花夢不同安得涪翁香一瓣種成聊供小南豐
元華文叔幼武詩云丹葩醉染猩猩血素萼便娟比霜
雪呈妖逞艷豈足貴含芳嗜潔誇精絕荼蘼飽浥春雨
膏玲瓏翦刻英瓊瑤千金腦麝和淑質萬箇玉蝶瑩柔
條坐看明月花梢上便應題作清虛牒醉眠花底不須
歸狼籍苔茵空撫掌先生愛花何太濃對花一飲揮千
鍾昔逢端伯稱韻友我欲結好慚衰容莫教搖落西風

後賈島留題傳不朽憐君為作茶蘼歌多情又釀茶蘼
酒明高青邱馬遠酴醿云池冷畫欄幽酴醿伴晚愁金
盤承露重彷彿漢宮秋王蓋臣象晉詩云皓齒舞霓裳
飄飄翠帶長何郎初傅粉荀令乍薰香玉蕊休誇白金
沙敢並芳可憐蜂與蝶早晚引風狂近時錢修亭畫綬
帶詩云匪伊垂却有餘紳品擬腰金色麗春翻笑康成
書帶草尊榮不似此花身宋向薊林子諶浣溪沙詞云
翠羽衣裳白玉人不將朱粉污天真清風為伴月為鄰
枕上解隨良夜夢壺中別是一家春同心少綰更尖新
晁次膺端禮鷓鴣天云紅紫飄零綠滿城春風于此獨

留情誰將十幅紅綾被撲向熏籠一夜明風不定雨初
晴曉來苔上拾殘英速教貯向鴛鴦枕猶有餘香入夢
清張仲宗元幹臨江仙云鶯喚屏山驚睡覺嬌羞須倩
郎扶荼蘼斗帳冷熏爐翠穿金落索香泛玉流蘓長記
枕痕消醉色日高猶倦妝梳一枚春瘦想如初夢迷芳
草路望斷素鱗書張叔夏炎西江月詞云花氣半侵雲
閣柳陰近隔春城畫欄明月暗瑤箏醉倚滿身花影翠
格素虬晴雪錦籠紫鳳香雲東風吹玉滿閒庭二十四
簾風靜劉後村賀新郎云曾與瑤姬約恍相逢翠裳搖
曳珠璣聯絡風露青冥非人世攬結玉龍驂鶴怕不奈

千條輕弱禱祝花神憐惜取到開時晴雨須斟酌枝上
雪莫消却惱人還似中狂藥凭危欄燭光交映樂聲遙
作身上春衫香重透看到參橫月落算茉莉猶低一著
坐有緱山王郎子倚玉簫度曲難為酢君不顧鑄成錯
又云想赴瑤池約向東風名姬駿馬翠韉金絡太液池
邊鵲羣下又似南樓呼鶴畫不就濃纖嬌弱羅帕封香
來天上瀉銅盤沆瀣供清酌春去也被留却芳魂再返
應無藥似詩吟綠衣黃裏感傷而作愛惜尚嫌蜂採去
何況流鶯戲落且放下珠簾遮著除却江南黃九外有
何人敢與花酬酢君認取莫教錯又云淺把宮黃約細

端相普陀巖裏金身珠絡萼綠華輕羅襪小飛下祥雲
彩鶴朶朶賽蜂腰纖弱已被色香撩病思儘鵝兒酒美
無多酌看不足怕殘却人間難得傷春藥更枝頭流鶯
喚起少年狂作留取姚家花相伴羞與萬紅同落臉肯
讓臘梅先著樂府今無黃絹手問斯人清唱何人醉休
草草認題錯元段德黻宏章洞仙歌云一庭晴雪了東
風孤注睡起濃香占窓戶對翠蛟盤雨白鳳迎風知誰
見愁與飛紅流處想飛英弄玉共駕蒼煙欲向人間挽
春住清淚滿檀心如此江山都付與斜陽杜宇是曾約
梅花帶春來又自趁梨花送春歸去春渚紀聞云蔣子

有家藏東坡先生手書一詞云紅杏了天桃盡獨自占
春芳不比人間蘭麝自然透骨生香對酒莫相忘似佳
人魚合明光只憂長笛吹花落除是寧王既不知曲名
常以問先生門下士及伯達仲虎叔平諸孫皆云未之
見也又不知魚合明光是何等事或云是酴醾也

附錄

金沙花一名金沙羅似酴醾花單瓣紅艷奪目花經金
沙花六品四命宋梅聖俞詩云金有披沙得花應不可
多栽培由地力艷色與天和玉座君王賞朱欄將相羅
稱觴千萬壽繁葉奈香何王半山詩云午陰寬占一方
苔映水前年坐看栽紅藥似嫌塵染污青條飛上別枝

開醪醖一架最先來夾水金沙次第栽濃綠扶疎雲對
起醉紅撩亂雪爭開海棠開後數金沙高架層層吐絳
沙咫尺西城無力到不知誰賞魏家花黃山谷詩云天
遣茶蘼玉作花紫綿揉色染金沙憑君著意樽前看便
與春工立等差周益公詩云滿架冰肌合碧雲翻堦碧
袖助紅裙玉堂只有金沙在伴直明年又屬君楊誠齋
詩云獨插茶蘼冷却伊金沙作伴暖相依茶蘼枯了來
年補且看金沙也自竒雙松樹子碧團圞紅錦纏頭白
錦冠儘放花枝過墻去不妨分與路人看又詩云金沙
道是殿羣芳不道茶蘼輸一場十里紅妝蹋青出一張

錦被灑晴香只須舊蔭已無暑更走新條如許長若恨
昨朝來草草夜來風雨更禁當

木香花佳品也灌生如薔薇有三種花開於四月惟紫心
白花為最香馥清遠高架萬條望若香雪他若黃花紅
花白細朶白中朶白大朶花皆不及王敬美學圃雜疏
疑酴醿即白木香華希閔事類賦以為木香即酴醿考
曲洧舊聞云木香有二種俗說檀心者號酴醿不知何
所據京師初無此花始禁中有數架民間或得之相贈
遺曰禁花今則盛矣又花木考云陶學士穀曰洛社故
事賣酴醿木香插枝者均謂百宜杖二花並列豈能
無別耶陳肥遯景沂全芳備祖亦分為二據此則木香
自當別列一譜矣唐邵楚萇詩云春日遲遲木香閣窈

窈佳人褰繡幙淋漓玉露滴紫蕤綿蠻黃鳥窺朱萼橫
漢碧雲歌處斷滿地花鈿舞時落樹影參差斜入簷風
動玲瓏水晶箔宋劉原父詩云粉刺叢叢鬪野芳春風
搖曳不成行只因愛學宮妝樣分得梅花一半香徐仲
車慎郎中園木香云仙子霓裳曳紺霞瓊姬仍坐碧雲
車誰知十日春歸去獨有春風在慎家張芸叟詩云庭
前一架已離披莫折長枝折短枝要待明年春盡後臨
風三嗅寄相思廣寒宮闕玉樓臺露裏移根月裏栽品
格雖同香氣俗如何却共牡丹開晁詠之詩云朱簾高
檻俯幽芳露浥烟霏欲褪妝月冷素娥偏有態夜寒青

女不禁香從教春事年年晚要使詩人日日狂替取秋
蘭紐佩好忍隨風雨受淒涼王民瞻句云莫惜金錢買
玉英擔前春老過清明元郝凌川經夢遊木香洞府云
月牕青錦麝塵寒夢遶烟條露蕊看但覺身輕似蝴蝶
種香風物似槐安近時陳其年黃木香淡黃柳詞云蜂
黃褪了爭上枝頭簇嫩蕊成叢蒙澗竹覆徧書窗小屋
揉入紅槽碎珠續壓醅熟蕭疎亂秋菊引柔蔓暗香觸
月黃昏料爾傷幽獨折上鍊師通明冠子雅稱厭禳妝
束

薔薇繡品也一作墻薔草蔓柔靡依墻援而生故名一名

刺紅本草作刺花一名山棘一名牛棘一名牛勒其莖多刺勒入牛喜

食之故名一名玉雞苗益部方物記呼為錦被堆孟郊以

為花侯十二客圖稱為野客漢武帝稱為買笑花單而

白者更香結子名營實其類有朱干薔薇荷花薔薇刺

梅堆五色薔薇黃薔薇淡黃薔薇鵝黃薔薇白薔薇又

有紫者黑者肉紅者粉紅者名粉團康家四出嵇山重臺

長沙千葉會稽百葉野薔薇等種連春接夏清馥可入

他如寶相金鉢孟佛見笑七姊妹十姊妹三醉體態相

類十姊妹一名紫羅欄一名高良姜又有月桂一種花應月圓缺大

食占城等國出薔薇露療心疾調粉灑衣花經薔薇七
品三命梁劉敬之緩看美人摘薔薇云新花臨曲池佳
麗復相隨鮮紅同映水輕香共逐吹繞架尋多處窺叢
見好枝矜新猶恨少將故復嫌萎釵邊爛漫插無處不
相宜唐儲太祝光羲歌云裊裊畏數尋青青不作林一
莖獨秀當庭心數枝分作滿庭陰春日遲遲欲將半庭
影離離正堪玩枝上嬌鶯不畏人葉底飛蛾自相亂秦
家女兒愛芳菲畫眉相伴採歲蕤高處紅鬚欲就手低
邊綠刺已牽衣葡萄架上朝光滿楊柳園中暝鳥飛連
袂蹋歌從此去風吹香氣逐人歸孟東野郊歌云仙機

札札織鳳凰花開七十有二行天霞落地攢紅光風枝
嫋嫋時一颺飛散葩馥繞空王忽驚錦浪洗新色又似
宮娃逞妝飾終當一使移花根還比葡萄天上植樂天
詩云托質依高架攢華對小堂晚開春去後獨秀院中
央霽景朱明早芳時白晝長穠因天與色麗共日爭光
翦碧排千萼研朱染萬房烟條塗石綠粉藥撲雌黃根
動彤雲湧枝搖赤羽翔九微燈炫轉七寶帳熒煌淑氣
熏行徑清陰接步廊照梁迷藻梲耀壁變雕墻爛若叢
然火殷於葉得霜胭脂含臉笑蘓合裊衣香泱泱濡晨
露玲瓏漏夕陽合羅排勘纈醉暈淺深妝乍見疑迴面

遙看誤斷腸風朝舞飛燕
雨夜泣蕭娘桃李慚無語
芸蘭讓不芳山榴何細碎
石竹苦尋常蕙慘偎欄避
蓮羞映浦藏怯教蕉葉戰
妬得柳花狂豈可輕嘲詠
應須痛比方畫幘風自展
繡繖蓋誰張翠錦挑成字
丹砂印著行猩猩凝血點
瑟瑟盛金匡散亂菱紅片
尖纖嫩紫芒觸僧飄毳褐
留妓罽羅裳寡和陽春曲
多情騎省郎綠誇美顏色
引出好文章東顧辭仁里
西歸入帝鄉假如君愛殺
留著莫移將又詩云移根
易地莫憔悴野外庭前一
種春少府無妻春寂寞花
開將爾當夫人又詩云風
動翠條腰嫋娜露垂紅萼
淚闌干移他到此須為主

不愛花人莫使看張承吉祐詩云曉風抹盡臙脂顯夜
雨催成蜀錦機當晝開時正明媚故鄉疑是買臣歸賈
閼仙島題興化園亭云破却千家作一池不栽桃李種
薔薇薔薇花落秋風起荆棘滿園君始知朱慶餘詩云
四面垂條密浮陰入夏清綠攢傷手刺紅墮斷腸英粉
著蜂鬚膩光凝蝶翅明雨中看亦好况復值初晴杜牧
之詩云朶朶精神葉葉柔雨晴香拂醉人頭石家錦障
依然在閑倚狂風夜不收方誰飛詩云繡難相似畫難
真明媚鮮妍絕比倫露壓盤條方到地風吹艷色欲燒
春斷霞轉影侵西壁濃麝分香入四鄰看取後時歸故

里庭花應讓錦衣新皮襲美詩云誰繡連延滿戶陳暫
應遮得陸郎貧紅芳掩斂將迷蝶翠蔓飄飄欲挂人低
拂地時如墜馬高臨墻處似窺鄰祇應是董雙成戲翦
得神霞寸寸新又詩云濃似猩猩初染素輕于燕燕欲
凌空可勝細麗難勝日照得深紅作淺紅吳子華詩云
萬卉春風度繁花夏景長館娃人盡醉西子始新妝李
文山羣玉詩云堪愛復堪傷無情不久長浪搖千臉淚
風舞一叢芳似濯文君錦如啼漢女妝所思雲雨外何
處寄馨香韓致光偈雨中看薔薇云何處遇薔薇殊鄉
冷節時雨聲籠錦帳風勢偃羅帷通體全無力酡顏不

自持綠踈微露刺紅密欲藏枝恹意凭闌久貪吟放醜
遲傍人應見訝自醉自題詩裴常侍說詩云一架長條
萬朶春深紅嫩綠小窠勺只因根下千年土曾葬西川
織錦人牛秘書嶠詩云曉啼珠露渾無力繡簇羅襦不
著行若綴壽陽公主額六宮爭肯學梅妝徐昭夢負詩
云朝露灑時如濯錦晚風飄處似遺鈿重門刺著黃金
鎖莫被飛瓊摘上天李建勳句云錦江風撼雲霞碎仙
子衣飄黼黻香萬倍馨香勝玉蕊一生顏色笑西施無
名氏紅薔薇云九天碎霞明澤國造化工夫潛翦刻淺
碧眉長約細枝深紅刺短鈎春色晴日當樓曉香歇錦

帶盤空欲成結謝豹聲催麥隴秋春風吹落猩猩血宋
韓魏公錦被堆云碎翦紅綃間綠叢風流疑在列仙宮
朝真更欲熏香去爭擲霓裳上寶籠不管鶯聲向曉催
錦衾春晚尚成堆香紅若解知人意睡取東君不放回
夏英公竦句云攀折若無花底刺豈教桃李獨成蹊胡
武平紫薔薇云天上星垣貴人間花品高偷模煩象管
學翦費金刀西母停雲輦東卿駐節旄曉軒無限思香
架近蒲桃劉原父句云解向人間占五色風流不盡是
荼蘼徐仲車錦被堆云春風蕭索為誰張日暖仍熏百
和香遮處好將羅作帳襯來堪用玉為牀風吹亂展卷

君宅月下還鋪宋玉墻好向謝家池上種綠波深處蓋
鴛鴦鄭亨仲剛中詩云一架薔薇四面垂花工不肯費
臘脂淡紅點染輕隨粉浥徧幽香清露知張功甫紅佛
見笑花云芳菲成夢雨蘆纖慰眼嬌紅敢浪嫌不但瞿
曇當發笑老夫初看亦掀髯楊誠齋謝薔薇及酒云海
外薔薇水中州未得方旋偷金掌露淺染玉羅裳已換
桃花骨何須賈女香更煩麴生輩同訪墨池楊又野薔
薇云紅殘綠暗已多時路上山花也則稀薔苴餘春還
子細燕支濃抹野薔薇王梅溪佛見笑云學得荼蘼白
更能相繼芳金仙粲然笑鼻觀不聞香劉後村詩云浥

露含風匝樹開呼童靜埽架邊苔湘紅染就高張起蜀
錦機成乍翦裁公子但貪桃夾道貴人自愛藥翻階寧
知野老茅茨下亦有繁英送一杯楊吳齋詠佛見笑云
芳葩豐美折輕紅想是祇園秀氣鍾解使金仙猶動色
窺欄誰不解愁容僧北澗詩云紫透紅殷態度陳露葵
生色借芳新春風便是黃金屋羞殺黃金屋裏人元唐
才卿肅毛元升畫薔薇云色是昭陽第一人鑲金衣薄
不勝春毛生能畫非延壽不得黃金也逼真明楊孟載
基詠七姊妹花云紅羅鬪結同心小七蕊參差弄春曉
盡是東風兒女魂蛾眉一樣青螺埽三姊娉婷四妹嬌

綠窓虛度可憐宵八姨秦鏡休相妬腸斷江東大小喬
又薔薇圖云紫苞紅刺玉纖纖甘露收香入翠奩何處
南風開滿架綠陰庭院水晶簾王師古韋詩云弱香柔
蔓不勝寒十二圍屏錦繡攢秦殿曉妝俱窈窕習家春
事未闌珊憐將清奏愁中聽競折高枝醉後看好待詩
成酬勝賞東風休遣露華乾魯振之鐸詩云獨酌薔薇
下花陰亂午風有時殘露滴剛著酒杯中張銘盤新黃
薔薇云並占東風一種香為嫌脂粉學姚黃饒他姊妹
多相妬總是輸君淺淡妝王蓋臣詩云滿架青龍爭鼓
奮幾行紅粉競輝光倏然一陣微颺起大地氤氳灑異

香爭愛濃香一抹紅墜培締架費人工何如吉貝東臯
上冬底猶能御凜風近時謝方山詩云薔薇類月季條
枚微不同俱乏亭亭質蔭蔓延樊籠風吹花爭發隱如
張屏風小雨看更好遙映朱欄紅漫言遜桃李桃李滋
露濃勿輕示黃筌摹入圖畫中錢稼軒題十姊妹畫云
妝來肯作一般紅霞綺雲羅各鬪風欲訪雙成諸女伴
瑤臺西去路無窮先叔祖榕巢公徼外野薔薇花云綠
陰過雨搖闌風薔薇花放沿溪紅高枝低枝簇團錦雲
霞朶朶浮晴空杏蕊過肥梅太瘦此花別樣誇玲瓏蠻
鄉亦多好姿致冉冉香氣霏相蒙飛來山鳥掠翠羽嚶

聲無賴棲芳叢偶然躡枝墜花片如逞姚冶娛衰翁故
園開時在初夏城南勸賞豐臺同提壺攜榼坐席地酌
酒澆花懽未終有情更過夷徼外節已小暑花纔融侵
尋三載雅相對何因歸去休兵戎方子雲正澍詩云倚
風無力態嫣然滿架浮香媚晚烟宛似畫堂人睡後紅
衣亂搭繡簾前宋李橘山廷忠生查子詞云玉女翠帷
薰香粉開妝面不是占春遲羞被羣花見纖手折柔條
絳雪飛千片流入紫金卮未許停歌扇周邦彥六醜云
正單衣試酒悵客裏光陰虛擲願春暫留春歸如過翼
一去無迹為問家何在夜來風雨葬楚宮傾國釵鈿墮

處遺香澤亂點桃蹊輕翻柳陌多情更誰追惜但蜂媒
蝶使時印牕榻東園岑寂漸蒙籠暗碧靜逸珍叢底成
歎息長條故惹行客似牽衣待話別情無極殘英小強
簪巾幘終不似一朵釵頭顫裊向人歌側漂流處莫趁
潮汐恐斷鴻尚有相思字何由見得近時陳其年花犯
體又一詞云弄晴天紅蓄十丈盈盈媚初夏鬧花小架恰
倒影迴塘綠水如畫弄條亂舞銀墻罇胭脂千斛瀉籠
繡榻低枝近手偏將鴛袂惹老松挈雲吼濤聲繁英爭
蔓引松身都化似天半作勢處燭龍將下看灼灼猩肌
萬點照十二樓前渾不夜還則慮晚來風雨紅顏偏早

嫁又綺羅香云樓外金墉巷頭銀井隱約非花非霧一
片胭脂祇許鶯梭穿度怯攀折綠刺潛防賣窈窕紅情
暗與隔綃窗背著鞦韆朦朧最是竊香路小拈螺子鈿
盒將露華傅體殢他鴛侶一架薔藤重取殘春填補看
裊裊風裏腰支是盈盈夜來情緒誰悄把繡譜親描惹
墻花漫妬又黃薔薇河傳第四體云櫻桃已謝牡丹開罷
薔薇滿榭夕陽漫漫一架低亞檀痕污粉怕黃鸝一色
枝頭罵朦朧怕誰迸金丸打畫廊東繡花叢芳絨施朱
近也慵

附錄

刺藤葉圓細而青花重葉狀似玫瑰而大艷麗可愛有

紅黃二種而無香明吳匏庵寬詩云茶蘼有數種同名
而異字花開欲折難鋸鉤如棘刺白者幹獨長紅者香
更膩種之小徑旁所恨胷衣袂插竹加編縛步障差可
類石家金谷園恐乏此佳致近時錢稼軒畫黃刺蘼云
漫將朱粉索餘香點點檀心暈額黃想是清齋無一事
道家粧束倚清防

玫瑰花醲品也類薔薇莖短花色紫嬌艷芬馥有香有色
堪入茶入酒入蜜為囊為醬一名徘徊花時人謂之枚
穰資暇錄以為當呼梅槐南海諺云蛇珠千枚不及玫
瑰玫瑰美珠也即火齊花色似之故名俗呼離娘草西
谿叢話以為刺客花經玫瑰七品三命瓶花譜玫瑰五
品五命燕中有黃玫瑰嵩山有碧玫瑰天台有白玫瑰
樂遊苑有玫瑰樹唐唐茂業詩云麝炷騰清燎鮫紗覆
綠蒙宮妝臨曉日錦段落東風無力春烟裏多愁暮雨
中不知何事意深淺兩般紅司空文明曙句云暗妬翻
堦藥遙連直署香徐昭夢詩云芳菲移自越王臺最似

薔薇好並栽穠艷盡憐勝綵繪嘉名誰贈作玫瑰春成
錦繡風吹折天染瓊瑤日照開為報朱衣早邀客莫教
零落委蒼苔宋子京句云瑤渚鏤空濛水繞捲重疊
寒光欲衝斗迥秀難藏葉誰碎辟邪香氤氳飛作蝶誠
齋紅玫瑰云非關月季姓名同不與薔薇譜牒通接葉
連枝千萬綠一花兩色淺深紅風流各自矚脂格雨露
何私造化工別有國禾收不得詩人薰入水沉中明陳
如愚淳詩云色與香同賦江鄉種亦稀鄰家走兒女錯
認是薔薇沈警詩云命笑無人笑含嬌何處嬌徘徊花
上月空度可憐宵徐文長畫玫瑰云畫裏看花不下樓

甜香已覺入清喉無因摘向金陵去短擷長丁送茗甌

近時黃石牧句云生來合是依人命從不容渠在樹看

陳其年河傳

第八體

詞云踈籬半掩輕風斜颭濃香幾點

藥欄邊纔綻盈盈紫艷粉娥勻睡臉頻呼小玉私搴取
提籠去小滴盈階雨撲幽芬沿蘚痕繽紛刺兜金縷裙
又念奴嬌云陟驚春去算風光此際又逢櫻筍拂曉謝
娘簾閣畔忽逗賣花聲韻籃底氤氳擔頭狼籍紫艷濃
香噴佳人競撚看來和露尤俊最愛別樣心情天然梳
掠偏厭紅英襯揉得花魂魂盡碎另作一番安頓焙入
衾窩薰歸裙縫細細調紅粉玉郎不覺錯疑戴向雲鬢

月季花榮品也一名長春花一名月月紅一名鬪雪紅一名勝春一名瘦客小於薔薇有紅白淡紅三色逐月一開四時不絕陳叅政以為天下風流花百氏集以為人閒不老春張文潛以為天上物宋韓魏公詩云牡丹殊絕委春風露菊蕭疎怨晚叢何似此花榮艷足四時長放淺深紅宋子京詩云羣花各分榮此花冠時序聊披淺深艷不易冬春慮真宰竟何言予將造形悟東坡詩云幽芳本長春暫瘁如蝕月且當付造物未易料枯枿也知宿根深便作紫笋茁乘時出婉婉為我暖栗冽先生早貴重廟論推英拔而今城東瓜不記召南芟陋居

有遠寄小圃無潤躡還為久處計坐待行年匝臘果綴
梅枝春杯浮竹葉誰言一萌動已覺萬木活聊將玉蕊
新插向綸巾折子由詩云客背有芳叢開花不遺月何
人縱斤斧害意肯留枿偶乘秋雨滋冒土見微茁猗猗
抽條穎頗欲傲寒冽勢窮雖云病根大未容拔我行天
涯遠幸此城南茆小堂劣容卧幽閣粗可躡中無一尋
空外有四鄰匝窺墻數袖實隔屋看椰葉蔥蒨獨此苗
愍愍待其活及春見開敷三嗅何忍折徐仲車積詩云
誰言造物無偏處獨遣春光住此中葉裏深藏雲外碧
枝頭常借日邊紅曾陪桃李開時雨仍伴梧桐落後風

費盡主人歌與酒不教閑却賣花翁一從春色入花來
便把春陽不放回雪圃未容梅獨占霜籬初約菊同開
長生洞裏神仙種萬歲樓前錦繡堆過盡白駒都不管
綠楊紅杏自相催一謝芳菲更不還誰何嬌步獨盤桓
雖於物態為難有却是時情總易闌日曬香肌難避暑
雪濡粉面亦禁寒等閑莫使人知處長與詩家醉後看
誰與猩猩血染紅重重疊疊費春工應無暴物侵和氣
自有深根藏暖風每見靈芝三秀了回看凡艷一時空
如環光景循將徧又到江南梅信通枝上踈踈花啓房
輕綃重錦迭為裳更分深淺兩般色不作尋常一面妝

舜有紅華須鬪艷蘭雖清節亦交香吟翁未唱先投筆
為與東君詠海棠簡齋詩云月季花上雨春歸一憑闌
東西南北客更得幾回看誠齋詩云只道花無十日紅
此花無日不春風一失已剝胭脂筆四破猶包翡翠茸
別有香超桃李外更同梅鬪雪霜中折來喜作新年看
忘却今晨是季冬楊吳齋白云自有嬌紅間蒼葉不隨
凡卉待春回百氏集白云花落花開無間斷春來春去
不相關朱淑真詩云一枝纔謝一枝妍自是春工不與
閒縱使牡丹稱絕艷到頭榮悴片時間明劉殷彝繪詩
云綠刺含煙鬱紅苞逐月開朝華抽曲沼夕蕊壓芳臺

能鬪霜前菊還迎雪裏梅
蹋歌春岼上幾度醉金杯
張銘盤詩云一番花信一番新
半屬東風半屬塵
惟有此花開不厭一年長
占四時春近時家初白詩云春偷桃杏妍
夏竊芙蓉艷秋榮雜桂菊冬至亦時歛
樂子之無知多將四時占玉靜堂權詩云小春天氣亦佳哉
花也欣欣蝶也來花似有情供客賞高枝未謝矮枝開數叢紅艷曲欄旁
幾日抽梢欲過墻最愛黃昏捲簾坐清芬一院勝燒香金醉墨洋月季云蟾魄盈虧十二回
竒葩應候盎中栽劇憐小朶隨時艷不比凡花幾日開豈賴鼓催依舊發任他風信總新裁也知月季同華夏自挾

嬌紅海外來宋王仙麓冠卿採桑子詞云牡丹不好長
春好有箇因依一兩三枝但是風光總屬伊當初只為
嫦娥種月正明時教恁芳菲伴著團圓十二回舒信道
亶一落索云葉底枝頭紅小天然窈窕後園桃李漫成
蹊能占得春多少不管雪消霜曉朱顏長好年年若許
醉花間待拚了花間老趙坦菴亶朝中措云開隨律琯
度芳辰鮮艷見天真不比浮花浪蕊天教月月常新
薔薇顏色玫瑰態度寶相精神休教歲時月季仙家欄檻
長春先伯祖蓮坡公菩薩蠻詞云花花葉葉枝枝艷年
年月月朝朝見莫訝四時新人間不老春香魂何處結

仙桂還同窟却笑海棠叢東風一瞬濃

附錄

四季花一名接骨草葉細花小色白自三月開至九月
午開子落

| | | | |
|--|--|--|--|
| | | | |
|--|--|--|--|

繡球花斐品也一名粉團一名雪球一名玉團木本春月
開花五瓣百花成朶團團如球花有紅白二種蜀有紫
繡球宋楊吳齋詩云紛紛紅紫競芳菲爭似團酥越樣
竒料想花神閒戲擊隨風吹起墜繁枝琢玉英標不染
塵光含月影愈清新青皇宴罷呈餘伎拋向東風展轉
頻朱元白長文玉蝶球云玉蝶交加翅羽柔八仙瓊萼
並含羞春殘應恨無花採翠碧枝頭戲作球元張光弼
昱詩云繡球春晚欲生寒滿樹玲瓏雪未乾落過楊花
渾不覺飛來蝴蝶忽成團釵頭嬾帶應嫌重手裏閒拋
却好看天女夜涼乘月到羽輪偷駐碧闌干明謝茂秦

榛詩云高枝帶雨壓雕闌一蒂千花白玉團怪殺芳心
春歷亂捲簾誰向月中看于念東若瀛詩云春色變園
姿虛亭裊烟霧綠萼間瓊朶團團低入戶一夜折繁枝
淒淒風雨妬錯落水晶球苔痕雜委露凌晨發永嘆踟
躑傷延佇陳元翥鴻詩云盈盈初發幾枝寒映戶流蘇
百結團正恐東風先颺盡不愁連日易消殘淡姿向曉
迷蝴蝶艷色爭春笑牡丹惟有三郎兒戲甚還疑蹋踣
繞叢看陳如愚淳詩云東風吹琪樹幻出冰雪姿虛亭
落清影夜半月明時張銘盤詩云散作千花簇作團玲
瓏如琢巧如攢風來似欲擬明月好與三郎醉後看王

鳳洲詩云誤馬染塵香自滾窺枝團月碧俱浮蘭臺任
更吹多少不結丁香一段愁又題繡球花云暫以碧雲
色微籠春月圓拋人暗香裏誤馬軟塵邊高彥恢棟題
雪球花云玉簇雲開雪作團輕盈冷艷不勝寒王孫蹴
踰歸來晚猶愛冰姿鏡裏看近時張蕭亭乞繡球花云
曾向君家乞水仙明珠翠羽照堂前淡烟輕雨流蘇結
又愛名花璧月圓家初白盆中繡球云久留生意未為
薪近報唐昌蕊又新碎翦有痕千瓣雪密攢無縫一團
春壓梢自重非關鳥帶葉全低欲礙人記得月燈球樣
似白頭重見意猶親又日本繡球云南風來海外吹綻

小團團吐萼初含綠染根俄變丹垂垂懸蹴踔袞袞壓
闌干雨打戎葵折留渠愛惜看又題墨繡球云春風壓
簾吹不動簇蒂攢莖密無縫美人纖手搓欲圓嬌鳥一
梢低更重駢枝倒挂玉蕊仙暖氣散作藍田烟粉痕洗
盡墨光出自有此花無此妍高西園詩云亭亭白鳳出
墻東刷羽高騫綠蔭中香陣亂飄春瑣碎清宵細展月
玲瓏渾迷燕子梨花雨巧學詩人柳絮風更為花王張
錦幄流蘇深護蕊珠宮陳其年水龍吟詞云洞天雲海
沉沉瓊扉小闢銀球墜亂拋下界細粘枝上輕颺斜綴
刀剪無聲裁縫滅跡粉搓雪膩笑墻頭柳絮成團打塊

學嬌樣終難似誰把一規圓月破工夫玲瓏劃碎玉欄
干外映來一色亭亭常在絕代瓊姿明妝自好胭脂都
退被佳人折下紅尖戲蹴向鞦韆背朱竹垞玉樓春云
玉繡球出今番早蝶翅蜂鬚迭回抱一年一度雪成團
半雨半風春未老者回上樹青猿報合配鞦韆紅香入腦
枝頭能得幾人憐落地始知花亦好先叔祖榕巢公一
叢花云年前此際對芳叢灑酒醉嬌紅輕雲淡日簾櫳
外萼華動摇曳庭中霞臉霧鬟柔姿無力端為嫁東風
今春不料尚相逢離緒已恁恁當茲細雨霏霏裏覺鮮
艷粉色朦朧仙骨素肌檀心翠葉好處見天工

錄附

紅繡球亦名山丹與草本山丹名同物異出倭國花簇
紅球儼如剪綵今閩粵間處處有之宋劉後村詩云偶
然避雨過民舍一本山丹恰盛開種久樹身樛似蓋澆
頻花面大如杯怪疑朱草非時出驚問紅雲甚處采可
惜書生無事力千金移入畫欄栽陳止齋傳良詩云軒
窗一日粲三英盡室無塵眼倍明閩粵固嘗矜絕美風
騷猶未及知名無名氏詩云亭下佳人錦繡衣滿身纓
絡綴明璣晚來銷歇無尋處花已飄零露已晞烟紅露
綠曉風香燕舞鶯啼春日長誰道使君負月老繡屏錦
帳咽笙簧人間花木眼曾經未識斯花狀與名丹却青

山暮春色續他紅樹墜時英

| | | | |
|--|--|--|--|
| | | | |
|--|--|--|--|

112

石竹花鑿品也一名石菊一名大菊一名繡竹草品纖細而青翠花有五色單葉千葉又有翦絨嬌艷奪目嫵媚動人千瓣者名洛陽花蜀中石竹有碧花花經石竹九品一命唐獨孤至之及詩云殷疑曙霞染巧類匣刀裁不怕南風熱能迎小暑開遊蜂憐色好思婦感年催覽贈添離恨愁腸日幾迴司空文明曙詩云一自幽山別相逢此寺中高低俱出葉深淺不分叢野蝶難爭白庭榴暗讓紅誰憐芳最久春露到秋風皇甫子安冉詩云散點空階下閒凝細雨中那能久相伴嗟爾滯秋風陸魯望詩云曾看南朝畫國娃古蘿衣上碎明霞而今莫

共金錢鬪買斷春風是此花宋林和靖句云所重晚芳
留在目可闕秋色易為花深枝萼萼裝溪翠碎片英英
翦海霞王半山詩云退公詩洎樂華年欲取幽芳近綺
筵種玉亂抽青節瘦刻繒輕點絳花圓風霜不放飄零
早雨露應從愛惜偏已向美人衣上繡更留佳客賦嬋
娟又詩云春歸幽谷始成叢地面紛敷淺淺紅車馬不
臨誰見賞可憐亦解度春風又句云斜倚細叢如有恨
冷搖數朶欲無春文與可同詩云蜂齧紅蕊爛蟲啼碧
叢短秋風掠地起只有蒼苔管張文潛耒詩云真竹乃
不花爾獨艷暮春何妨兒女眼謂爾勝霜筠世無王子

猷豈有知竹人粲粲好自持時來稱此君楊監丞詩云
長夏幽居景不窮花開芳砌翠成叢窗南高卧追涼際
時有微香逗晚風元虞伯生詩云積雪初消萼綠華東
風吹動絳綃霞龍嘘石氣千年潤鶴過林陰一徑斜刻
字欲尋金錯落析旌如織翠交加綺窓坐對吹笙暖未
覺人間歲月賒蒲秋陽道源詩云短籬新見出梢梢葱
蒨都無尺許高茜色芳葩工點綴莫教容易混蓬蒿近
時吳梅村洛陽花云綠窗昨夜長輕莎玉作闌干錦覆
窠丹纈好抽秦氏勝墨痕重點石家螺剪同翠羽來金
谷織並紅羅出絳阿千種洛陽名卉在不知須讓此花

多王抱山詩云一幅徐熙畫幾叢嬌更妍香風亭午過
知有麝香眠錢修亭題畫石竹云麝香眠處羅衣繡李
杜詩篇不易求工巧縱令并剪快染成五色可能不錢
稼軒畫石竹云貞心介節態偏幽偶托卑叢謝寒修試
取芳名比君子鄭公嫵媚有嘉猷宋晏元獻採桑子詞
云古蘿衣上金針樣繡出芳妍玉砌朱闌紫艷紅英照
日鮮佳人畫閣新妝了對立叢邊試摘嬋娟貼向眉心
學翠鈿

夾竹桃貞品也一名俱那衛卽俱那異自嶺南來艷類桃
而葉類竹故名自春及秋逐漸繼開宋李太白觀詩云
暖碧覆晴殷依依近水欄異類偶相合勁節何能安同
時盡妖艷無地容檀欒移根既不可潔心誠為難外貌
任春色中心期歲寒正聲尚可聽誰是伶倫官梅聖俞
和楊直講夾竹花圖云桃花天紅竹淨綠春風相間連
溪谷花留蜂蝶竹有禽三月江南看不足徐熙下筆能
逼真蠶素畫成纔六幅萼繁葉密有向背枝瘦節疎有
直曲年深粉剝見墨蹤描寫工夫始驚俗從初李氏國
破亡圖書散入公侯族公侯三世多哀微竊買檐頭由

婢僕太學楊君固甚貧直緣識別爭來鬻朝質絺袍暮
質琴不憂明日鐙無粥裝成如得驪頷珠誰能更問龍
牙軸竹真似竹桃似桃不待生春長在目明王敬美世
懋詩云名花踰嶺至婀娜自成陰不分芳春色猶餘晚
歲心絳分踈翠小青入嫩紅深本識仙源種無妨共入
林何來武陵色移植向深閨葉不迎秋墮花仍入夏齊
菲菲能拂石冉冉更成蹊尚挾風霜氣流鶯未敢棲寂
寞誰相問清齋隔市囂忽遺芳樹至應識雅情高布葉
踈疑竹分花嫩似桃野人看不厭常此對村醪近時胡
瓶菴詩云嶺表由來異卉多爭妍上國意云何巫山暮

雨籠紅玉洛浦朝霞襯碧波
暈染乘龍腰矯矯艷攢么
鳳尾娑娑莫嫌寂寞縈鄉夢
珍重幃簾護小柯風情每
令憶清湘不敵繁英細細香
茜袖自諧君子配青衣初
試美人妝共名百葉情宜洽
同卜千年日最長堪笑河
陽花滿縣未聞勁節表竒芳
一徑權封瀟灑侯新添錦
浪更蠲愁不從妃子爭嬌態
自與王郎號勝流并剪將
交花欲雨火珠方吐葉含秋
入簾魚愛森森玉迴異人
間粉黛羞問訊東橋恐未知
鶯捎燕掠總相宜幾愁春
色無歸處却入秋陰欲向誰
青女莫教丹竈冷紅兒自
與碧簫期撩人最是磨鎌月
寒印深深窈窕姿林間卜

築固堪娛細剪鮫綃翠影扶傾國傾城常瘦削宜烟宜
雨更嫺都依稀雲夢凌寒骨隱映華清出浴膚怪得石
家豪太甚緣珠絡日鬪珊瑚露滋寒砌蘚痕斑養就高
枝發妙顏為要好多常謹護不嫌斜出豈頻刪輞川獨
坐朝華近台嶺同遊晚翠攀夢合娟娟憐灼灼幾回蕭
颯復幽閉芙蓉脂肉黛初安何處多情日幾竿艷思全
遮疑有鶴濃姿半露恐驚鸞渡頭拾翠歌聲暖溪口蒸
霞逸韻寒乞得西王盤裏核種成青玉映朱欄不分春
後與秋前日日紅腮擁翠鈿但使玉衡長映地豈須葭
管更儀天繁條自帶風霜氣高節猶饒雨露妍樂府新

詞須再疊可同嵇阮到林泉錢稼軒詩云湘水花源面
九疑霜斑風片引人思欲知絕代幽棲處翠袖天寒獨
倚時錢竹初詩云渭畝通秦洞紛披到眼疑誰將君子
節併作美人姿踈影蒸霞亂穠華穉粉滋折來如削杖
桃竹舊名宜崔曼亭和云嫵媚何處見門掩正懷人傾
國虛傳影真心莫問津明霞烘翠袖玉筍帶紅塵有淚
無言裏斑斑醜面頻金醉墨詩云誰翦霞綃裹綠衣栽
花種竹事相依迷離秦洞標清節瀟灑淇園簇絳幃灼
灼紆青臨淺水菁菁帶艷映斜暉綺窗爛漫堪娛目碧
玉珊瑚一樹輝馬朗山詩云一身合併兩般魂占斷風

情向小園書記平安添日報花開綽約識仙根松梅乍
見應須友劉阮重尋誤認村幾度端詳頻問取猗猗灼
灼竟無言不同連理兩枝牽賦性難分孰後先結實自
應招翮羽開花渾欲誤漁船溪邊春漲浮千片林下清
談聚七賢未識何人神妙手忽然幻合此因緣王孔翔
麟生詩云桃花夾葉擬名難錯認瀟湘竹幾竿一片紅
雲清有骨數枝春色夏生寒女塙漫倚東風笑畫檻常
宜細雨看小摘不教驚瘦影為渠扶醉立闌干朱竹垞
減蘭詞云石闌干曲試問是桃還是竹鳳子來時捧土
移根定武薤崔徐花朵布葉終須文與可吹徧溫風長

伴樽前一簇紅